

23
ZISTWAR ZO
EK KAYMA



ZISTWAR ZOVA EK KAYMAN



Bonom Zova enn zour ti al travay, so sak lor so ledò. Kouma li ariv dan milie enn gran-gran laplenn, li tann koumadir enn zanfàn ape plengne. Bonom Zova aret marse, li ekoute li rode: an-verite, sa ti enn kayman ki ti anba enn pie-kasi dan bor sime.

Kouma kayman-la trouv Bonom Zova vinn akot li, li dir li:

- *Ayo, bonom, kouma ou bon-ker, soulaz mwa enn tigit! Mo pre pou mor afors mo'n fatige, lorla, mo pe gagn mari swaf. Mo nepli kapav marse. Met mwa dan ou sak lor ou ledò, al zet mwa larivier. Bondie kontan kan dimounn gagn sagrin bann malere!*
- *Me kouma to oule mo amenn twa dan mo sak? Zame to pou kapav rant dan sa sak-la; to tro gran pou tini ladan.*
- *Mo ava aranz mo lekor dan tel manier pou ki li kapav rantre. Met sak-la anba, ouver li, oumem ou pou gete.*

Bonom Zova ti enn bon dimounn. Li met sak-la anba, li ouver li. Kayman roul-roul so lekor an-ron kouma enn pake lakord lor pon enn navir, li rant dan sak, li dir Zova:

- *Trouve! Ala mo dan ou sak bonom! Anou ale.*

Zova met so sak lor so ledò, li ariv bor larivier, li zet kayman dan dilo.

Ler kayman finn bien bwat, finn bien bengn so lekò dan dilo, ala li gagn fin. Bonom Zova ti pe asize pou repoze enn ti morso sitan li ti fatigue sarye sa gro pake-la lor so ledò. Kayman koste ek li, dir li dan enn manier inpe foutan:

- *Eh ou la bonom! mo pe gagn fin, mwa! Mo kone ki laser dimounn enn bon manze pou kayman. Donn mwa enn kote ou lazam pou mo dezene.*

Zova sezi.

- *Ki ete! Mwa ki fek sov to lavi, to oule manz mwa! To napa onte!*
- *Ki onte ena pou fer ladan? Mo pe gagn fin, mo trouv enn bon manze devan mwa, mo bizin gagn onte pou manz li! Ou krwar koumsa kayman bet, bonom?*

Kouma zot de ti ape sipote, ala mama poul pase. Zova dir ar kayman:

- *Gete! Anou dimann sa mama poul-la sipa twa ki ena rezon oubien mwa. Mo ava aranz mo lekò dan tel manier pou ki li kapav rantre. Met sak-la anba, ouver li, oumem ou pou gete.*
- *Ok, dakor! Dimann li, nou ava gete.*

Mama poul ekout zot. Apre, li tourn kote bonom Zova, li dir li:

- *Mo fer dizef, dimounn manze. Mo kouv piti, dimounn manze. Ler mo vinn vie, e ki mem kok nepli vinn pre kot mwa, dimounn touy mwa, met mwa anpandan anba pie-papay pou mo laviann vinn tann; lerla zot kwi mwa dan masala, fer moulouktani apre zot manze. Eski to krwar mwa ki kapav anpes kayman kap twa?*

Mama poul ale. Zova res sek, kayman riye.

Ala vas vinn bwar dilo larivier. Zova apel li, li rakont li mem zafer. Vas reponn:

- *Eh bonom! Les mo bwar mo dilo do! Mwa ki pou al gagn traka si kayman manz ou? Mo donn zot dile, zot bwar, zot fer diber, zot fer fromaz ; mo gagn piti, zot touye, zot manze ; ler mo vinn vie, zot tir mo lapo, met sek; tir mo korn, fer kouyer. Bonom, les mo bwar mo dilo, do !*

Kouma kayman pou al sot lor bonom Zova, lisien nek pase. Bonom apel li.

Ler lisien finn tann tou zistwar, li dir bonom ek kayman:

- *Eh zot! Zot oule badinn ek mwa! Mwa ki pou al krwar ki sa gro kayman-la kapav rant dan sa tipti sak-la! Zour lisien vinn bourik, lerla zot ava resi fer zot fangouni ek mwa! Mo bizin trouv sa ek mo prop lizie pou mo kapav krwar. Met sak-la anba, bonom! Twa kayman, to kapav vremem rant dan sa sak-la, twa? Enn gro zaimo lerin red kouma banbou kouma twa?*

Zova met sak anba, kayman roul so lekor an-ron, li rant dan sak. Lisien dir ek bonom:

- *Ferm sak-la ek amar li bien.*

Zova amar sak. Kayman firye, gele, debat. Zova ek lisien kit li dan sak, zot ale, zot riye.

Afors-afors li lager ek sa sak-la, kayman fini par fer enn trou ladan: enn kou li sorti, me bonom ek lisien ti lwin. Kayman mazine kouma li pou kapav pas so koler lor zot.

Kayman anter so lekor anba labou dan bor larivier, li espere.

Apre enn bon moman kan li'nn res koumsa, ala mama poul vinn bwar dilo. Kayman napa bouze. Vas vinn bwar dilo, kayman napa bouze. Tou zanimò vinn bwar dilo, kayman napa bouze.

Ala lisien vini: kayman lev enn kou dan milie labou, li chombo lisien par enn lapat. Me lisien-la malin. Kouma li trouv lizie kayman koumadir bouse ek labou, li riye, li dir li:

- *Eh twa, kayman, to krwar mo lapat ki to finn chombo! Kouma to bet, kayman zis enn tipti siko dibwa sa!*

Kayman etone. Li oblize ouver labous pou gete. Lisien nek sove, chwit enn sel kou, mo dir ou. Kayman res sek.

Ala kouma lisien finn trouv ankor enn fwa, mwayin pou badinn ek kayman.

